

# **Pol ile malueng ako i wat i a toko lemioongare nge aka o voth a rem a Pilipai Pilipai**

## **Ritetong nge a Pilipai**

Nge wop lemi aka Pol i plosa ma i es aka la a epee a Masedonia mo aro i panongpol or nge Panongpolong Sivenga, i es aka a rem pomnga a Pilipai. (O thepola Pakekere ole Omaing 16:9-40) Na ile panongpolong aken i pavelpol toko lemioonga pelie a rem aken. Lamako i los lelpot or. Na tovu po pelie i vus, lamako o rere a Pol a rem relnga e, ma o paeso i a mang a midenga lemi. Na toko powe ninengare o ri ve i voth a mang a midenga aka a rem pomnga a Rom. (Pakeke 28:14-31) Na Pol i wat malueng ake a mang a midenga lemi mo i ri ve aro i ri sivenga nge Pilipai angare, ke o seveal opoaling e sungongre a i nge. (1:5; 4:10-19) Na i ritet mun or nge ile menong aka a mang a midenga lemi. Na toko pelie o sis ve aro o pavelpol mun matheong pelie a Pol nge, aveto Pol ilemi voth mos nge matheong aken tomo nge ile menong a mang a midenga lemi, kene avele. Avele, ilemi sivenga inga aka Panongpolong Sivenga i kima a pen elonga. (1:12-26) Na lemi sivengaing a vothung ini ur aolonga aka malueng ake i ri nge. (1:4; 1:18; 2:2; 2:17-18; 2:28-29; 3:1; 4:1; 4:4) Na Pol i pator toko lemioongare aka o voth a Pilipai mo

o mit engeng na o ngeip avele nge Panongpolong Sivenga panesnga. Na o mothong tova o ngange nge areko o sis ve aro o pakerenga or. (1:27-30) Aken ini ur aolonga ako i voth a malueng ake lemi. Na Pol i nin mun Pilipai angare ve aro o paruru osivenga mo o opoal tokokoere, ranga ve ako Krais i oma i. Krais ini a God, aveto i paruru isivenga ma i velpol ini toko neneanga, na i ranga ve ini toko umonga ako i opoal it. (2:1-11) Na i ria mun or ve aro i pake toko sivenga or aini a or nge, ini a Timoti ome a Epaproditus. (2:19-30) Na i tor mun ole nge pamirealonga le apaltetongare ako o ri ve, i pavurvur toko i velpol ini toko vengvenga a God itheki, tova ve i panes vothung sivenga aka toko ulue angare o ri nge. Aveto Pol i ri ve, aro lemiro inga nge a Krais, aken aro te velpol ini toko vengvengare a God itheki. (3:1-21)

## **Pilipai angare o velpol ini a Pol itein sivesivengare, mako Pol ilemi sivenga rintet nge or**

*(Vonge 1:1–4:23)*

<sup>1</sup> Tho a Pol tomo nge a Timoti, them ini a Krais Jisas ile umongare.

Na tho wat malueng ake a thomu areko ini a God ile tokokoe alavusnga areko o teo a Krais Jisas nge, aka o voth a Pilipai, tomo mun nge areko or ini lotu a mukalingare aka ole lemioong i motu, na ole opoalingare mun. <sup>2</sup> Aro thomu o el themosaling na lemi moring a Titemer a God tomo nge ar Pomnga a Jisas Krais nge.

*Pol ilemi rum Pilipai angare ole sungong a i nge  
ma i ri sivengaing a God nge.*

<sup>3</sup> Tho ri sivengaing a God nge, nge lomu lemi rumong alavusnga nge tho. <sup>4</sup> Na nge lek nongong alavusnga, tho nong a God nge, nge thomu, ma tho nong tomo nge riseaing, <sup>5</sup> eneke thomu o opoal tho nge Panongpolong Sivenga panongpolng a nge lomu sungong. Na lomu omaing aken i patea nge nang ako thomu o nongpol tel panongpolong aken, na i mul nge ponange. <sup>6</sup> Na tho nong mun venen aken, eneke lemik mire ako i nunganga lale aka ve, God aka i patea ile omaing sivenga a lomumu, aro i kis ile omaing aken i mul nge aka aro i pavus i, nge nang aka Jisas Krais aro i lo werer nge me.

<sup>7</sup> Na i vengveng aka aro lemik i voth venen aken nge thomu, eneke ok sagu rintet thomu, eneke aro ve tho voth a mang a midenga, eve tho mit nge riong mo tho lel nge panongpolong aka tho panongpol nge, na tho pathengal i aka ve, Panongpolong Sivenga aken i nunganga, aken kene thomu o opoal tho nge lek omaing nge Panongpolong Sivenga panongpolng a nge God i sungu i a tho nge, nge ile themosaling, na thomu o opoal tho nge aken nge lomu sungong a tho nge. <sup>8</sup> Na God ilemi mire aka lek riong ake i nunganga aka tho ri ve, lemik i engeng ve aro tho voth werer tomo nge thomu, na ok sagu thomu nge a Krais Jisas ile asaguong aka i voth a tho nge.

<sup>9</sup> Na lek nongong nge thomu i vene: Aro thomu o rong esa lomu asagupeling nge aka aro lomu mire i aolonga nge a God, naro lomumu i nine nge ur alavusnga. <sup>10</sup> Na tho nong ve aro thomu

o venen re aken, mo aro thomu o pavurvur ako aro o avrum senu vothung kathnga ako i sivenga rintet, na nge ako aro thomu o riri, na toko e avele i pavurvur aro i teltun omu. Na ake ini lomu omaing ako o monsi nge nang ako aro Krais i lo werer nge me. <sup>11</sup> Na tho nong mun ve aro thomu o vual nge vothung vengvenga aka Jisas Krais i pavelpol i a lomu mimiong mo aro tokokoere aro o thopol lomu mimiong aken, naro o papomnga a God na o risea i nge.

*Pol ile esoong a mang a midenga i paengeng tokokoere nge Panongpolong Sivenga panongpolng a.*

<sup>12</sup> Titeikre, tho sis ve aro lomumu mire ako, ur aka i velpoltun tho, aka o paeso tho a mang a midenga, i mit roal Panongpolong Sivenga panongpolnga avele, aveto toko pulua rongan o nongpol nge. <sup>13</sup> Ranga ve aka mit tetalonga alavusnga aka o theal nepes a Sisar ile vel, tomo mun nge toko alavusnga aka o voth a pen ake, olemi mire aka tho voth a mang a midenga ake, eneke tho oma a Krais ile omaing. <sup>14</sup> Na toko lemioonga pulua o thopol a God ile opoaling nge tho, aka tho voth a mang a midenga ake, mako ole lemioong i engeng nge a Toko Pomnga, mako ole ngeipong ol e avele na o panongpol engeng nge a God ile riong.

<sup>15</sup> Na i nunganga aka toko pelie oni plong nge iok le kimaing na oni silal tho, mako o panongpol nge a Krais ile riong. Aveto pelie o panongpol, eneke ole lemi rumong i sivenga nge tho. <sup>16</sup> Or ini areko o panongpol, eneke oa sagu tho, na olemi

mire ako, tho voth a mang a midenga mo aro tho mit nge riong, naro tho lel nge Panongpolong Sivenga aka tho panongpolong nge. <sup>17</sup> Aveto areko oni plong nge iok le kimaing, o panongpol mun nge a Krais ile riong, eneke o sis ve aro o theal osivenga, na ole lemi rumong i vengveng avele, na olemi aka ve, o pavurvur aka aro o rong esa matheong mun a tho nge, aka tho voth a mang a midenga lemi. <sup>18</sup> Na i vava nge aken? Aro ve ole lemi rumong i sivenga eve i kerenga, ur e avele, eneke ake ini a Krais ile panongpolong aka tokokoere o nongpol i, na lemik i sivenga nge aken.

*Pol i sis ve aro ile mimiong alavusnga aro i papomnga a Krais iion.*

Na o sis ve aro o palemi kerere tho, aveto aro tho kis inga riseaing, <sup>19</sup> eneke nge lomu nongong a God nge, nge tho, na nge a Jisas Krais Ioni ile mit tomoing nge tho, kene lemik mire aka ur areken aro i pavropol lek mimiong el werernga. <sup>20</sup> Na lemik ve aro i velpol venen re aken, eneke tho sis rintet ve aro tho oma ur e avele aka aro lek mara nge, ave tho sis ve ponange na panen aro tho mit engeng, na evelelnga aro tho papomnga a Krais nge lek mimiong tomo mun nge lek rinong. <sup>21</sup> Na lemik i vene, eneke aro ve tho mimi, aro tho papomnga inga a Krais. Na aro ve tho rin, aro i sivenga nge aken. <sup>22</sup> Aveto aro ve rongan tho mimi, tho pavurvur aro tho oma a Krais ile omaing mun pelie. Naro tho panes kathnga? Aro tho mimi eve tho rin? I pavurvur aro tho ritet thomu nge avele. <sup>23</sup> Eneke lemik aini aini tun

nge, tho sis ve aro tho rin mo aro tho voth tomo ol nge a Krais, eneke aken i sivenga rintet nge mimiong ake ru a ulue. <sup>24</sup> Aveto nge thomu, i sivenga ako tova ve aro tho mimi ake ru a ulue mo ako aro tho opoal thomu. Na opoalngomu aken kene i aolonga rintet nge lek esoong a Pen a Urvet. <sup>25</sup> Na lemik i engeng ve lek omaing rongan i voth ako aro tho opoal thomu nge, aken lemik mire lale ako ve, aro tho mimi, naro tho kis inga nge opoalngomu mo aro lomu lemioong i motu, naro lomu lemi sivengaing nge lomu lemioong aken aro i aolonga. <sup>26</sup> Na nge ako tho velpol werer a thomu nge, aro tho opoal thomu venen aken mo aro thomu o vual rintet nge a Krais Jisas iriseanga, eneke tho ake aro tho voth tomo werer mun nge thomu.

*O mit engeng nge lomu lemioong na o el inga matheong, eneke God i sungu or alaini a thomu nge.*

<sup>27</sup> Na ur inga ako i aolonga ini lomu mimiong ako aro i panes vothung ako Krais ile Panongpolong Sivenga i ri nge. Na aro ve tho es na tho thopol thomu, eve tho voth mela nge thomu, aro thomu o oma venen aken mo aro tho nongpol ako rongan thomu o mit engeng, na lomumu omole ol inga nge ako lomu vur engeng ranga ve ini toko omole, nge lomu lemioong panesnga ako Panongpolong Sivenga i pavelpol i a thomu nge. <sup>28</sup> Na tho sis ve aro tho nongpol mun ako thomu o mit engeng nge ako saluk thomu tie avele nge lomu ngarangre. Na aro ve saluk thomu nge lomu ngarangre avele, aken i pathengal or

ve, God aro i pakerenga or, na i pathengal mun thomu ve, God aro i pamimi thomu. <sup>29</sup> Naro o mit engeng, eneke God i oma senu nge thomu, ako isa wompot thomu ve aro o oma a Krais ile omaing, na ilemi inga ve aro lomumuo inga nge i avele, aveto aro o el mun matheong, eneke thomu ini ile. <sup>30</sup> Na ur aken i nunganga, eneke thomu o el matheong ranga ve aka thomu o thopol i aka tho el i nomenga, na ponange thomu o nongpol mun aka rongan tho el i.

## 2

### *Te mothong tova te opoal inga sivenger.*

<sup>1</sup> I nunganga aka lomu teoong a Krais nge i paengeng thomu, na i nunganga mun aka ile asaguong i pasivenga lomumu, na i nunganga mun aka Oni Riringa omole inga i voth a lomumu omole omole, na i nunganga mun aka lomumu esal pel na o themosal mun pel. <sup>2</sup> Maken aro thomu o palemi senu rintet tho nge lomu vothung aka ranga ve, lomu lemi rumong kene aro i vur e pel inga, na lomu asaguong kene aro i vur e pel mun inga, naro lomu omaing tepun omole ol inga, na lomumu kene aro i omoletet inga. <sup>3</sup> Na o mothong tova o theal inga sivengomu, eve o oma ur aka aro i papomnga polpol iomu nge, aveto aro o paruru sivengomu na lomumu aka ve, tokokoere o pomnga nge thomu. <sup>4</sup> Na o mothong tova lomumu i voth inga nge ur aka aro i opoal sivengomu, aveto aro lomumu i voth mun nge ur aka aro i opoal tokokoere.

*Aro te paruru sivenger ranga ve ako Krais i paruru isivenga.*

<sup>5</sup> Na lomu lemi rumong aro i vene re aken, aka ranga ve ini a Krais Jisas ile. Na ile lemi rumong i vene:

<sup>6</sup> Na evelelnga i voth ini a God,  
aveto ilemi ve aro i krim tuntun ile menong  
ako i vur e pel tomo nge a God, kene  
avele.

<sup>7</sup> Aveto i eltetpot isivenga nge ile menong aken  
ma i velpol ini toko,  
ma i men vulut ol inga  
ranga ve ini toko um polpolonga.

<sup>8</sup> Na tokokoere o thopol i  
ma i ate ranga ve ini toko,  
ma i paruru isivenga,  
na i panes a God ilemi,  
ma i mul nge ile rinong  
ako i rin alamimminga a won ngoronga  
nge.

<sup>9</sup> Mako God i paesa i roro rintet,  
ma i aosele toko alavusnga,  
ma i sungu ion e  
ako i roro rintet nge ioning alavusnga a i  
nge.

<sup>10</sup> Na i oma venen aken  
mo aro ur alavusnga  
ako o voth a Pen a Urvet,  
na malang po, na ulue, na Wali,  
aro o koru oeve  
mo o papomnga a Jisas iion aken.

<sup>11</sup> Na e mun e nge aka aro or alavusnga  
aro o ri milimlemu i aka ve,  
Jisas Krais ini ur alavusnga oa Pomnga.

Na nge ole riong aken  
 aro o papomnga mun a God  
 ako ini Titemer.

*Aro ler mimiong aro i to ranga ve ini sivemitre.*

<sup>12</sup> Maken, thomu areko ok sagu thomu, God i el werer thomu lale, maken aro thomu o oma ol vothung ako i panes lomu menong tomo nge a God aken, ranga ve aka evelelnga thomu o panes vothung nongalnga aka thomu o oma i nge aka tho voth tomo nge thomu. Na ponange tho voth tomo nge thomu avele, na i sivenga rintet aka aro thomu o kis reletun inga vothung aken omanga. Na nge aka thomu o oma venen aken, aro o pavothal rintet nge a God, <sup>13</sup> eneke ini God aka i um a lomumu na i sung ile engenging na ile lowoming a thomu nge, ve aro o oma omaing aka i sis ve aro o oma i.

<sup>14</sup> Na nge lomu omaing elonga o mothong tova o ri pompom na o vol pel a lemi. <sup>15</sup> Aro thomu o oma venen aken, mo aro thomu o velpol ini tokokoe areko toko e avele i pavurvur nge tel-tunngomua, naro lomu vothung i riri inga, naro thomu ini a God itutunre aka o oma vothung kerenga e avele, nge aka thomu o voth tomo nge areko o leklek na o oma inga vothung kerenga. Na lomu tolilisong i ranga ve ini sivemitre aka o topot a tokokoe areken oa lemimi. <sup>16</sup> Naro thomu o topot a oa lemimi, nge aka aro thomu o krim engeng nge riong aka i sung mimiong. Na tho sis ve aro thomu o oma venen aken, mo aro tho pavurvur aka aro tho pasea thomu nge nang aka aro Krais i lo werer nge me, aka lek omaing engenga a thomu nge kene ini ur polpolnga avele.

<sup>17</sup> Aveto aro ve ur kerenga i velpoltun tho, aro lemik i sivenga inga nge. Na lomu lemioong i ranga ve ini sungong ako thomu o oma i a God nge, na aro ve o palel ok mla, na o otoka i a lomu sungong aken nge, mo ako aro i pavus lomu sungong aken, akennga aro lemik i sivenga inga tomo nge thomu alavusnga. <sup>18</sup> Na tho sis ve aro lomumu i sivenga mun venen aken, mo lomumu i sivenga tomo inga nge tho.

*Riong nongpolnga aro i ritet tel aka ilemi vava nge a Pol, lamoko Pol aro i pakepot a Timoti a Pilipai angare nge la.*

<sup>19</sup> Na lelle inga atike na lemik ve aka tho pavurvur aro tho pakepot a Timoti a thomu nge wot, tova ve Toko Pomnga a Jisas i sis ve aro tho oma venen aken. Naro tho pakepot i mo aro lemik sivenga mun tomo nge thomu nge aka aro tho nongpol nge lomu menong le kimaing. <sup>20</sup> Aro tho pakepot a Timoti, eneke toko ol e avele ilemi rumal thomu nge lomu menong ranga ve ini i. <sup>21</sup> Eneke toko elonga o theal inga aka ini osivenga ole menong, na olemi i voth nge a Jisas Krais ile omaing avele. <sup>22</sup> Aveto lomumu mire lale aka ve, Timoti ini toko aka i mit engeng nge tongporumong, nge aka i um tomo nge tho nge Panongpolong Sivenga panongpolnga, ranga ve ini wain aka i um tomo nge itema. <sup>23</sup> Maken palolo avele na lemik ve aka tho pavurvur aro tho pakepot i a thomu nge wot. Na nge aka lemik mire nge ur kathnga aka aro i velpoltun tho, lamoko aro tho pakepot i a thomu nge wot viri viri. <sup>24</sup> Na lemik i voth nge a Toko Pomnga

ve, ako aro lelle inga atike na engek aro tho es mun a thomu nge wot.

*Pol i ri ve aro i pakepot tel a Epaproditus a Pilipai angare nge la.*

<sup>25</sup> Na lemik ve i vengveng ako aro tho pake werer a Epaproditus a thomu nge wot. Ini teik ako i um tomo nge tho na i mit tomo nge tho nge punong a omaing. Na ini lomu riong elnga ako thomu o pake i tomo nge lomu sungong mo i opoal tho nge ur aka tho poor nge. <sup>26</sup> Naro tho pake werer i a thomu nge wot, eneke ilemi voth engeng nge thomu alavusnga, na ilemi kerere, eneke lomumu i voth a i nge, nge aka thomu o nongpol aka ini multhang. <sup>27</sup> Na i nunganga aka i ngoo ma i toth aka aro i rin, aveto God i sung ile themosaling a i nge, na i sungu i a ienga inga nge avele, aveto i sung mun i a tho nge, aro vene mo tho el matheong mun e. <sup>28</sup> Maken lok wom rintet nge i ve aro tho pake i a thomu nge wot mo aka aro ve thomu o thopol werer mun i, aro lomumu i sivenga nge i, maken aro lemik i sivenga werer tie nge thomu. <sup>29</sup> Maken aro thomu o nongpoo i nge a Toko Pomnga iion tomo nge riseaing aolonga. Naro o papomnga tokokoe areko o ranga ve ini i, <sup>30</sup> eneke i sungpot ile mimiong, mako i toth aka aro i rin, nge aka i oma a Krais ile omaing, na i sung opoaling nge tho aka thomu o pavurvur nge omanga avele.

### 3

*Te velpol ini toko vengvengare a God itheki aka nge ler lemioong inga.*

<sup>1</sup> Na titeikre, lek riong patopalalnga i vene: Aro lomumu sivenga, eneke thomu ini a Toko Pomnга ile. Na aro ve tho wat mun riong a thomu nge ako tho ri tel i a thomu nge lale, ur ol e avele ol a tho nge, ako aro tho oma i, eneke ake ko aro i paseral thomu.

<sup>2</sup> Na o nakalal thomu nge areko o ranga ve ini nanau pilre. Or ini areko o oma vothung kerenga na o isis pelekpol ole, mako olemi ve o velpol ini a God ile.\*

<sup>3</sup> Eneke it re ake ini a God ile ako i istetpot ler vothung kerenga a it nge na te lotual a God nge Ioni Riringa, na lemir i ngo nge a Krais Jisas ile omaing a it nge, na lemir ol nge ler vothung ako aro i opoal it, kene avele. <sup>4</sup> Aveto sivengek, tho pavurvur ako aro lemik i ngo nge lek vothung mo i opoal tho, tova ve i sivenga ako aro tho oma venen aken, ave i sivenga avele.

Na aro ve toko e ilemi ve i pavurvur aro ilemi i ngo nge ile vothung, akennga tho mukal nge i.

<sup>5</sup> Lek nang or limme, nako o is lek, na tho ini toko Israel, na lek net re ake ini a Benjamin, na nomenga tho panes Hibrure oa pompomere ole vothung, na lemik mire nge okei, na tho mun ini Parisi, or ini toko avlung ako o panes vengveng rintet a Moses ile patorong, <sup>6</sup> na tho sis rintet ve aro tho oma a God ile omaing, make nomenga tho pakeraenga areko ole mio nge a Jisas,† na toko e

---

\* **3:2:** Pol i ri nge areko o engeng nge a Moses ile patorong panesnga tomo mun nge a Jisas ile riong panesnga. Maken o engeng ve aro toko lemoongare aro o is mun ole mo aro o velpol ini a God ile. † **3:6:** O thepol a Pakeke 8:3; 22:3-4 na Galesia 1:13-14.

avele i pavurvur ako aro i teltun ok nge a Moses ile patorong panesnga.

<sup>7</sup> Aveto ur areken ako nomenga lemik ve aro i opoal tho, ponange lemik mire lale aka ve, i mit roal aka ini tho nge a Krais ielonga. <sup>8</sup> I nunganga aka ur alavusnga aken elonga ini ur polpolnga ol re a lemik, eneke tho sis rintet ve aro tho ini a Krais Jisas ile, aka ini ok pomnga, na aken i sivenga rintet nge ur alavusnga. Na nge ipanesnga tho modop ur alavusnga, na lemik nge aka i ranga ve ini sesalang, na tho oma venen aken mo aro tho elo a Krais mo ini lek <sup>9</sup> na tho ini ile, na tho velpol ini toko vengvenga nge aka tho panes a Moses ile patorong, kene avele. Aveto God i oma tho mo tho ini toko vengvenga a itheki, eneke nge lek lemioong inga nge a Krais. <sup>10</sup> Na tho sis ve aro tho voth ol ini a Krais ile, na tho sis mun ve aro God ile engenging aka i palos werera Krais nge, aro i voth mun a lek mimiong. Na matheong aka Krais i el i, tho sis mun ve aro tho el mun i. Na tho sis mun ve aro lek lemi rumong i ranga ve ini ile lemi rumong aka i voth a i nge, nge aka i rin. <sup>11</sup> Maken aro tho voth tomo mun nge areko Krais aro i palos werera or nge rinong, ave aro tho es tomo nge or vava?

*Pol i um ranga ve aka i tho engeng nge sertet-peling.*

<sup>12</sup> Na o mothong tova lomumu ve tho ini toko vengvenga lale, eve tho sivenga rintet mun lale, avele. Aveto tho, tho engeng ve aro tho krim bibim ur areken, eneke Krais i krim bibim tho mo aro tho oma venen aken. <sup>13</sup> Titeikre, lemik aka ve, tho krim bibim ur areken rongan. Aveto ur

omole inga ako tho oma i kene i vene: Tho the werer avele, na tho tho engeng inga a mukaling la, <sup>14</sup> na tho engeng ve aro tho sertet mo tho mul nge wop ako God i ateal i ve ini lek, mo aro tho ela ile sungong Pen a Urvet anga aka i ateal i a tho nge, nge aka tho teo a Krais Jisas nge.

<sup>15</sup> Maken areko a it nge aka o motu nge ler teoong a Krais nge lale, aro lemire aro i venen re aken. Na aro ve omu e ilemi ngo relpot, akennaga God aro i pathengal mun i nge. <sup>16</sup> Aveto i sivenga aka aro te kis reletun inga nge vothung aka God i pathengal i a it nge lale.

<sup>17</sup> Titeikre, aro thomu o oma i ranga ve aka tho oma i, na o naktet lomu vothung ranga ve aka thomu o thopol i a them nge. <sup>18</sup> Tho ri venen aken, eneke toko pulua ole vothung i ranga ve aka ole ngarang nge omaing aka Krais i oma i a won ngoronga nge, na nomenga tho ritet thomu nge or papulua, na ponange tho ritet mun thomu nge or, ma tho tang nge. <sup>19</sup> Na ole god aka o panes i, ini ur areko i voth a oopo lemi, na vothung aka ler mara nge, kene o papomnga osivenga nge omanga, na ole lemi rumong i voth inga nge ur ulue anga, naro nge ole vusong aro o el kerengaing. <sup>20</sup> Aveto it kene ini Pen a Urvet anga, na lor wom nge aka te men tetal toko pamimionga aka aro i esu a pen aken nge me, ini Toko Pomnga a Jisas Krais. <sup>21</sup> Naro i eksing nir peti sesnga mo i velpol ranga ve ini isivenga ini peti a urvet, naro i oma venen re aken nge ile engenging aka aro i paesu ur alavusnga a isa thewo nge.

**4**

*Pol i pator Pilipai angare ole.*

<sup>1</sup> Maken titeik areko ok sagu thomu, aro thomu o mit engeng nge a Toko Pomnga ranga ve ako tho wat i a thomu nge lale. Na lenik i voth engeng nge thomu, na thomu o palemi senu tho, na thomu o ranga ve ini ok vevea aka o pauru tho nge, na thomu re ake ini thengengek areko ok sagu thomu.

<sup>2</sup> Na tho tor engeng a Iuodia ome a Sintike ve aro ole volpeling i vus, naro or paini ole lemi rumong i omole ol inga, eneke or paini o teo a Toko Pomnga nge. <sup>3</sup> Na e mun e aka, kles, tho nin wong ve aro ong opoal seng or aini aken aka o um engeng tomo nge tho nge Panongpolong Sivenga panongpolnga, tomo mun nge a Klemen na thengengek areko them um tomo nge pel, na or kene oion i voth a erere nge aka i ritet nge areko God aro i sung mimiong aka aro ile vusonga avele a or nge.

<sup>4</sup> Na evelelnga aro thomu o risea nge lomu teoong a Toko Pomnga nge, naro tho ria mun ve, aro thomu o risea i. <sup>5</sup> Naro thomu o pathengal lomu mosing a vothung a toko alavusnga nge, eneke Toko Pomnga i toth me lale. <sup>6</sup> Na o mothong tova lomumu rit nge ur e, aveto nge menong elonga, aro thomu o nin a God nge lomu nongong tomo nge ri sivengaing a i nge. <sup>7</sup> Maken aro God ile lemi moring aka i aolo leltun ler lemi rumong aro i paseral lomumu na lomu lemi rumong, eneke thomu o teo a Jisas Krais nge.

<sup>8</sup> Na titeikre lek riong patopalalnga i vene: Ur kathnga i nunganga, na ur kathnga ako te pavothal nge, na ur kathnga mun i vengveng, na ur kathnga i riri rintet, na ur kathnga mun e ako ar sagu i, na vothung kathnga ako i sivenga ako te theseal i, na ur alavusnga aka i sivenga, na ur alavusnga aka tokokoere o risea i, kene aro lomumu rumsetun nge ur alavusnga areken. <sup>9</sup> Na ur kathnga mun aka tho patalor thomu nge na tho sung esu i a thomu nge, na ur aka o nongpol i nge tho, na o thopol i a tho nge, aro thomu o kis inga omanga.

*Pol i ri sivenga nge sungong aka i el i a Pilipai angare nge.*

<sup>10</sup> Tho risea Toko Pomnga roro nge ile omaing aka i palolo mun tie, lamako thomu o paponganga werer mun lomu lemi rumong nge tho. Na i nunganga aka rongan lomumu rum tho, aveto lomu sovengalo e avele aka aro thomu o pathengal i a tho nge. <sup>11</sup> Na o mothong tova lomumu ve, tho ri venen aken, eneke tho poor nge ur pelie, eneke tho el mire lale nge aka aro lemik sivenga inga nge menong kathnga aka tho voth nge. <sup>12</sup> Na lemik mire nge sivengek thealngeka tova ve, tho men vulut, eve lek ur elonga pom, na nge menong elonga aka tho voth nge, tho el mire lale nge aka aro lemik sivenga inga nge, tova eve sek pup, eve tho men mesi, na eve lek ur elonga pom, na eve tho oror mun nge ur pelie. <sup>13</sup> Tho pavurvur nge menong elonga areke mennga, eneke tho el engenging a Toko Pomnga nge lale.

**14** Aken i nunganga, aveto i sivenga nge thomu ako thomu o el mun lek matheong. **15** Na thomu Pilipai angare sivengomu lomumu mire mun ako nge wop lemi aka thomu o nongpol tel Panongpolong Sivenga nge tho, lama tho plos lelpot lomu epee a Masedonia, na tho el sungong mun nge rem e avele aka lotu i voth nge, ini inga engomu.\* **16** Na rongan tho voth tothal a thomu nge aka a Tesalonaika, palolo avele, nako thomu o opoal tho nge lomu sungong pa omole inga a tho nge avele, nge aka tho oror nge ur pelie.† **17** Na o mothong tova lomumu ve, tho engeng nge sungong elnga, avele, aveto tho engeng ve aro lomu sungong monnga aro i aolonga a thomu nge. **18** Na i ranga ve aka tho el omu thangaroong olalnga lale na i vus re aken, na thomu o pangoloa i, na tho oror ol nge ur e avele ol, nge aka tho ela lomu sungongre aka o sungu i a Epaproditus nge ma i pasong i a tho nge me. Na lomu sungong aken i ranga ve ini sungong aka thomu o sungu i a God nge aka i una vro na God ilemi i sivenga nge ma i risea mun nge. **19** Na lek God aka ile ur sivesivenga aka i pom rintet, aro i sung ur alavusnga aka thomu o oror nge a thomu nge, nge aka thomu o teo a Krais Jisas nge.

**20** Maken aro te risea ar Vovo a God evelelnga aka aro ile vusonga avele. I nunganga.

### *Pol i patopalal ile malueng.*

**21** Tho pasungalu lek nang sivenga a God ile tokokoe alavusnga areko o teo a Krais Jisas nge.

---

\* **4:15:** O thepol a 2 Korin 11:9. † **4:16:** O thopol a Pol ile esu esaing ake nge a Pakeke 16:11–17:10.

Na titeik areke o um tomo nge tho o pasungalu mun ole nang sivenga a thomu nge. <sup>22</sup> Na God ile tokokoere ako o voth a pen ake o pasungalu mun ole nang sivenga a thomu nge tomo mun nge areko o theal a nepes a Sisar ile vel ake.

<sup>23</sup> Na Toko Pomnga a Jisas Krais ile themosaling aro i voth tomo nge thomu.

Na i re aken. I vus.

**God Ile Riong Kinnga Ponganga nge  
Mangsengre Okei  
The New Testament in the Mangseng Language of  
Papua New Guinea  
Nupela Testamen long tokples Mangseng long Niugini**

copyright © 1999 Wycliffe Bible Translators, Inc.

Language: Mangseng

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 11 Nov 2022 from source files  
dated 9 Oct 2020

65e1c726-2893-536b-a159-517869464e50